

Kerajaan tidak akan biar rakyat daif — Musa

Bahan asal dari Arkib
Negara Malaysia

TANJUNG LUMPUR (KUANTAN), Khamis — Timbalan Perdana Menteri, Datuk Musa Hitam hari ini menegaskan kerajaan Barisan Nasional tidak akan membenarkan masyarakat di negara ini tertindas, terbiar atau dibiarkan dalam keadaan daif.

Beliau berjanji, Kerajaan akan terus mengambil berat terhadap kesulitan masyarakat dan mengadakan rancangan-rancangan yang teratur dan berkesan untuk memperbaiki keadaan hidup masyarakat.

Beliau berkata demikian ketika berucap kepada kira-kira 4,000 penduduk di kampung nelayan ini dan sekitarnya.

Pada sebelah pagi, beliau mendengar taklimat dari pegawai-pegawai Majuikan mengenai nelayan dan

rancangan-rancangan yang dijalankan untuk kepentingan mereka.

“Dari hasil perjumpaan pagi tadi telah menguatkan azam saya untuk mengenalpasti secara lebih mendalam kehidupan kaum nelayan dan tindakan-tindakan yang benar-benar berkesan yang boleh diambil akan dilaksanakan supaya mereka tidak terasa terbiar di negara yang maju dan membangun ini” katanya.

Jejas

Beliau berharap rakyat memahami hakikat bahawa dalam menjalankan usaha meningkatkan lagi taraf hidup rakyat kerajaan perlu menyusun rancangan-rancangan mengikut keutamaan.

Datuk Musa menerangkan, adalah penting bilangan nelayan di negara ini tidak dibiarkan menjadi terlalu besar hingga

menjejaskan hasrat kerajaan untuk menyalurkan bantuan.

“Adalah menjadi matlamat Kerajaan supaya nelayan dapat menjalankan usaha lebih berkesan dengan menggunakan cara-cara penangkapan ikan yang moden dan teratur,” katanya.

Sebilangan masyarakat nelayan diharapkan dapat menukar cara hidup dari menjadi nelayan tradisi kepada bertani dengan ditempatkan di rancangan-rancangan pembukaan tanah.

Katanya banyak kemudahan diberikan kepada anak-anak mereka terutama di bidang pelajaran di rancangan-rancangan tanah dengan harapan mereka akan berjaya dalam berbagai bidang dan dapat menyumbangkan tenaga dan fikiran untuk kepentingan rakyat dan negara.